queli non li erano observati, et *de converso*, se nostri fazeano con alcun suo desavantazo non potevan mai esser refati.

2.º Che 'l sia in libertà de li mercadanti nostri vender et comprar le sue mercadantie con cui li piaze, et de questo non siano subieti ad alcuno; et questo ve dizemo, perchè mori, zoè quelli mercadanti del soldan, per haver mercadantie conduxeno nostri a bon marcha', et a suo modo, non le lassano comprar ad alcuno, ita che a le fiate constrenzeno i mercadanti nostri a doverle dar per assa' meno pretio di quel valeno. e de quel sariano pagate, sì che instate assai, che 'l vender et comprar sia libero; e questo sopra ogni cossa importa.

3.° Che 'l signor soldan fazi, che li suo' comessi, come hora intendiamo à fato, non fazino mercadantia, ma siano homeni liberi, i qual solum atendino a far raxon a' mori et nostri, et a ziò judichino sinzieramente, et fazino observar le consuetudine, et non permeti alcun sia tortizado, nè da' mori manzado; e questo ve dixemo, perchè, da poi fati li marchadi, mori al pagamento li dava una specie per un' altra, li dava robe pessime, mal garbelade, marze et similia, non era cui li facesse raxon.

4.º Che in tempo di muda non sia fato le violentie fanno mercadanti mori, li qual si acordano insieme, o veramente per li merchadanti del soldan, che solevano tuor assai specie, e per venderle a so modo, non lassano alcun di mercadanti vendi a' nostri, ma loro, reducendo le cosse in ultima, tandem vieneno a far comprar nostri per forza a so modo; et le spezie, che per la quantità meriteriano esser pagate uno pretio conveniente, le meteno 30 et 40 per 100 piuj, come questa passata muda, che li zenzeri beladi erano im pretio di ducati 12, et per la excessiva quantità, non meritava esser pagati quel pretio, tamen li fezeno pagar ducati 18 et 20; sì che sopra ziò nezessita calda provision, et in ogni loco la mercadantia si fa con libertà e non con forzi.

5.º Che la sanssaria de le spezie non si pagi per mazor pretio nè stima de quel è il justo marcado son comprate; et questo, perchè meteno altratanto le spezie al pagamento de essa sansaria di quel è il pretio son stà comprade, cossa al tutto da non tollerar et insuportabelle, azonzendo a questo, che nostri mercadanti fra anno, nè dal nader, che in Alexandria scuode esso sanssarie, nè dal nadracas dal Cajero, nè d'alcun altro, possino esser astreti dar merze, nè danari a bon conto, ma in tempo de galie, o quando volesseno trazer le spezie, pagar esse sansarie; et questo, perchè haveano messo in consue-

tudine, esso nadracas et nader, retenir nostri mercadanti, et fra ano tuor da quelli quella quantità di merze e danari potevano per ducati 4 in 5 milia e più, e poi in tempo de galie erano desfati, e li nostri perdevano el suo.

Et questo anno passato a questo modo fo tolto a' diti nostri mercadanti robe et danari per zercha ducati 7000, et venuto el tempo de la muda, che judicavano doverli scontar, havendo la promessa di esso nadracas et l'armirajo di la terra, cambiono quel nader, et non li volseno scontar cossa alcuna; e perchè questo è andato in beneficio del signor soldan, è da far ogni cossa i siano messi a so conto, come difusamente, da li mercadati et consolo nostro, ne havereti information.

6.° *Item*, àno tolto el piper de cotimo sporte 460, dato pur per sansaria ducati 2200, et è solito pagar ducati uno per sporta, che son ducati 460; sì che anche questi è da meterli a conto.

7.º Non poco importa, che per quelli coza, et altri, vien tolto per forza panni, poletarie et altre mercadantie, le qual non li vien pagate, salvo al 91 modo li par et piaze, per tanto sia provisto, che alcun non ardisca tuor alcuna roba de' nostri mercadanti, salvo con suo bon voller.

8.° Che ancor sia garbellade le spezie habiamo, tamen si à talmente tratade, che di quelle ne habiamo intollerabel tara, per esser fraudadi li garbeli; di questo quel magnifico consolo e mercadanti ve ne dirà difusamente, et similiter de li pexadori, perhò che da ogni conto si è damnizadi.

9.º Che le spexe si pagano de le specie si traze, et da barato et contadi, son stà tanto acresute, che li sono un altro dreto, sì a le porte, come sopra la marina, dechiarando a esso signor soldan, si mai fo tempo di exevelar mercadanti, et minuir l'angaria a spezie, saria al presente, per dar causa i non andasse per altra via, come le vano.

X.º Era de li retenuto uno navilio di sier Bernardim Jova, quello procurati sia licentiato, et maxime che 'l ne era robe de' nostri mercadanti, cuori et altro, che si potria guastar; son certo sarà subito liberato, et forsi avanti el zonzer vostro de lì.

Vi aricordemo esser amizi di la nation nostra, Corcomas, che al presente è armirajo grando, et similiter Osdomur, diodar grando; item, e'l catibiser, etiam el lueli, nominato Alam, fo signor in Alexandria, et quelli altri vi aricordarà li nostri mercadanti; a l'incontro nemizi, et sempre contrarij a la nazion: prima el nadracas presente; item, uno si chiama Ebenebusba, ma sopra tuti el coza era in Ale-